

Handwritten in red ink:

Handwritten in red ink:



SYNOPSIS  
JURIS ECCLESIASTICI  
PUBLICI ET PRIVATI,  
QUOD  
PER TERRAS HÆREDITARIAS  
AUGUSTISSIMÆ IMPERATRICIS  
MAR. THERESIÆ

C M C.  
OBTINET.



---

VINDOBONÆ,  
TYP. IOAN. THOMÆ NOB. DE TRATTNERN,  
CAES. REG. AVLÆ TYPOGR. ET BIBLIOPOL.

MDCCLXXVI.

SYNOPSIS

OF THE


PUBLIC AND PRIVATE

OF THE

OF THE

OF THE

OF THE



OF THE


K. III. 17.





**UNIVERSI JURIS**  
**ECCLÆSTASTICI**  
TUM PUBLICI TUM PRIVATI  
**PROLEGOMENA.**

D E  
GENUINA JURISPRUDENTIÆ ECCLE-  
SIASTICÆ INDOLE, PARTIBUS, AC  
DIVISIONE.



I. *Jurisprudentia Ecclesiastica* est scien-  
tia legum Ecclesiasticarum conjuncta  
cum habitu leges ad facta appli-  
candi.

II.

Ut leges hæ recte & intelligantur & ad facta  
applicentur, determinationes Legum diligenter  
evolvendæ sunt.

A 2

III.

## III.

Igitur & rationes legum diligenter perscrutandæ.

## IV.

Rationes legum uti sunt multijugæ, *philosophica*, *historica*, *arcana*: ita ea cognitio Juris est perfectior, quæ plures legis rationes complectitur. Et

## V.

qui rationes legis perspicit, is *Spiritum legis* tenet.

## VI.

Hinc liquet, quam non utilis modo, sed & necessaria ad solidam Jurisprudentiam Ecclesiasticam *Philosophia moralis*, *Juris naturæ*, ac imprimis *Historia ecclesiasticæ* cognitio.

## VII.

Jus Ecclesiasticum aliud *divinum* & *humanum*, *publicum* & *privatum*, *scriptum* & *non scriptum*, *Vetus*, *novum*, & *novissimum*.

## DE ORIGINE ET PROGRESSU JURIS ECCLESIASTICI.

## VIII.

Nascente Ecclesia leges perpaucæ.

## IX.

Auctæ illæ Conciliorum Decretis, unde *Codices Canonum* multiplices orti, *Codex Ca-*

no-



nonum *Ecclesiæ Græcæ, Romanæ, Africanæ, Hispanicæ &c.*

In Germania sola vetus Canonum compilatio obtinuit, donec Carolus Magnus collectionem *Dionysianam* Romæ ab Hadriano Papa post medium seculi VIII. acceptam, domum referret.

XIX.

Exeunte seculo VIII. *Jus novum* ecclesiasticum; sub schemate tamen antiquitatis disseminatum est per collectionem Canonum *Isidori Mercatoris*.

XII.

A cujus temporibus auctus admodum est collectionum numerus; inter quas in Germania collectio *Capitularium Regum Francorum* eminebat, libris VII. a Benedicto Levita Moguntinensi comprehensa.

XIII.

Celebriores ceteræ collectiones erant, *Reginonis, Burchardi, Ivonis, & Gratiani*, cujus postremi collectio brevi in scholis & foris civitate ubivis donata fuit.

XIV.

Seculo decimo tertio ineunte Pontifices Romani ipsi collectionibus Canonum edendis animum adjecerunt; Innocentius III. *Innocen-*

XV.

XVI.

XVII.

XVIII.

XIX.

XX.

XXI.

XXII.

XXIII.

XXIV.

XXV.



*tiana*, & Honorius III. *Honoriana*, quas tamen longe postea superavere *Libri V. Decretalium* auctoritate Gregorii IX. collecti, & ab eodem anno 1234. ad Doctores & Scholares *Academiae Bononiensis* missi.

#### XV.

His a. 1258. *Sextus Decretalium* auctoritate Bonifacii VIII. additus.

#### XVI.

*Librum VI. Decretalium* subsequutæ sunt a. 1317. *Constitutiones Clementinae*; & has deum *Extravagantes Joannis XXII.* & *Extravagantes communes*.

#### XVII.

Atque his Collectionibus *universum Juris Canonici Corpus* absolvitur, dum, quæ postea conditæ leges sunt, non amplius in *Corpus Juris Canonici* referebantur, quorum complexus idcirco *jus novissimum* audit, cujus partes nobiliores sunt *Concilium Constantiense* & *Tridentinum*.

#### XVIII.

In Germania *juris novissimi* partem insigniorem *Concordata Germanie*, *Pax Religiosa* & *Westphalica* constituunt.

#### XIX.

Ita crevit in molem ingentem *Jus Canonicum*, quod per octo prima Ecclesiæ secula codice non valde amplo continebatur.

#### XX.





## XX.

*Jurisprudentia* Ecclesiasticæ forma in nascente Ecclesia admodum simplex erat.

## XXI.

Vitium traxit illa primum per *Isidori* pseudepigraphales, ac demum seculo 12. per tritum forenses.

## XXII.

Auxit malum abusus methodi scholasticæ, ac omnium maxime nocuit methodus sophistica, & problematica.


## XXXIII.

At renatis melioribus litteris & illa perpur-gari cœpit.

## DE PRINCIPIIS JURIS ECCLE- SIASTICI.

## XXIV.

Quandoquidem *Jurisprudentia* Ecclesiastica scientia est legum ecclesiasticarum, principiis certis & indubiis illa nitatur oportet, unde doctrinam suam de legibus deducat. Quare cum aliæ quidem in Jure ecclesiastico leges *divinæ* sint, ab ipso *JESU CHRISTO* latæ, quas tum in *Scriptura Sacra*, tum in *Traditione* Ecclesiæ reliquit suæ: aliæ *humanae*, quas seu *Apostoli*, seu successores eorum *Episcopi* in aut extra *Concilia* sanxerunt, relinquitur: duo



omnium prima Juris Ecclesiastici principia *Scripturam S.* esse atque *Traditionem*, cujus testes & depositarii *Patres Ecclesiæ* sunt; deinde *Concilia*, *Decreta Episcoporum singulorum*, præprimis *Pontificis Romani*. Atque hæc quidem vulgo *principia proxima* vocantur.

## XXV.

At quoniam nonnullæ disciplinæ Ecclesiasticæ exterioris partes sæpe aliquid admixtum habent, quod ad statum Regnorum civilem pertinet, in his etiam Principibus, & Imperantibus civilibus jus, quæ ad salutem publicam pertinent, determinandi competere, res ipsa loquitur; quo fit, ut & *summorum Imperantium Civilium leges* inter Juris Ecclesiastici principia locum habeant suum.

## XXVI.

De ejusmodi disciplinæ exterioris partibus interdum integræ nationes *pacta singularia* iniere, qualia in Germania sunt *Pax Religiosa*, *Westphalica*, *Concordata Germaniæ* &c. quæ proinde ex numero principiorum Juris Ecclesiastici non nisi immerito excluderis.

## XXVII.

Sed & *Juris naturalis leges* inter principia Juris Ecclesiastici collocandæ. Uti enim religio *revelata* religionem *naturalem* non destruxit, imo perfecit, ita & leges Juris naturalis obtinere etiamnum in Ecclesia debent.

Jus





---

# JUS PUBLICUM ECCLESIASTICUM.

---

DE  
ORIGINE, NEXUQUE PRIMIGE-  
NIO SOCIETATIS CHRISTIANÆ  
GENERATIM.

## XXVIII.

**S**ervator mundi CHRISTUS JESUS quum in-  
ter homines vitam ageret, interitum legis  
Mosaicæ non annuntiavit modo persæpe, sed  
aliam etiam in ejus locum societatem instituit,  
a judaica omnino diversam, quæ *Societas Chri-  
stiana* vocatur.

## XXIX.

Nexus institutæ hujus societatis per ejus-  
dem veræ fidei, eorundemque Sacramentorum  
participationem, ac dilectionis mandatum, nec  
non per concessam societatis hujus pastoribus,  
principaliter Petro, & ejus successoribus *pote-  
statem clavium* subsistit.

## XXX.

Quam societatem qui intrare vellent, per  
baptismum, seu pactum solemne ad nexus hu-  
jus observantiam se se adstringerent.

## A 5 XXXI.



## XXXI.

Societas igitur christiana divinæ originis est. Est societas perfecta nexu animorum non interno solum, sed externo etiam colligata cum unionis, tum subjectionis, nec non & pacti solemniss.

## DE LEGE FUNDAMENTALI SOCIETATIS CHRISTIANÆ.

## XXXII.

Quoniam porro formam, secundum quam societatem hanc suam Christus instituit, in scriptura sacra novi testamenti, tum in traditione orali nobis reliquit, liquet : Scripturam N. T. nec non Testamenti ejusdem traditiones divinas legem societatis christianæ esse fundamentalem.

## XXXIII.

Unde sicut in Jure Ecclesiastico ad verbum Dei scriptum, & traditum primo loco recurrendum, ita quæ ex iis rite deducuntur, invictæ sunt auctoritatis, modo ex genuino sensu scripturæ sacræ, & traditionibus *vere divinis* deducta sint.

## XXXIV.

Quapropter uti sensus scripturæ *divinus* a sensu *humano*, ita & traditiones *divinæ* ab *ecclesiasticis*, & hæc iterum a *vulgaribus* & *piis credulitatibus* probe sunt in jurisprudentia ecclesiastica *secernendæ*.

## XXXV.





## XXXV.

Et quoniam traditiones potissimum in scriptis *Patrum Ecclesiæ* continentur, etiam de horum auctoritate, rectoque usu diligenter præcipiendum in Jurisprudencia Ecclesiastica.

## XXXVI.

Neque tamen propterea scripturæ sacræ V. T. negligendæ. Sunt enim illæ æque *Verbum Dei*, & quantum ad veritates *credendas* in iis contentas, credere eas hodie debet Ecclesia Christiana non minus, ac olim Judaica, eo solum discrimine, quod quæ tum in figuris tantum nota, credebantur eventura, nos evenisse jam credamus.

## XXXVII.

At quantum ad *jus agendorum*, quod in iisdem V. T. scripturis continetur, sane leges illorum *ceremoniales, politice, & judiciales* nihil ad nos attinent, qui alias tum Ecclesiasticas, tum civiles leges habemus.

## XXXVIII.

Quamobrem neque a *statu publico* synagogæ & a sacerdotio veteris testamenti ad *statum & sacra Ecclesiæ christiane* invicta valet consecutio.

## XXXIX.

Lucis tamen non parum ex V. T. libris accedit N. T. scriptis, ob utriusque nexum, &



quod exemplo legis Mosaicæ haud pauca vi-  
geant in Ecclesia Christiana.

**DE JURE DETERMINANDI IN  
ECCLESIA, POTESTATE LEGISLA-  
TORIA ET JUDICIARIA.**

**XL.**

Jus determinandi cum correspondente obli-  
gatione parendi Societatibus perfectis alioqui  
proprium, a Christo etiam Ecclesiæ suæ in po-  
testate clavium, potestate ligandi & solvendi  
concessum esse, Scripturæ N. Testamenti locis  
bene multis luculenter perhibent.

**XLI.**

Ac Juris hujus concessionem mox usus ipse  
praxisque velin nascente Ecclesia comprobavit.

**XLII.**

Quod tamen intra Sphæram Sacrorum stetit.

**XLIII.**

In jure determinandi porro quoniam po-  
testas & Legislatoria continetur & judiciaria,  
utraq; a Christo Ecclesiæ concessa intelligitur,  
quam Apostoli etiam, eorumque Successores  
reapse exercuere.

**DE JURE COGENDI IN ECCLESIA.**

**XLIV.**

Cum distributio bonorum Spiritualium, quæ  
e Societate Christiana promanant, Ecclesiæ di-  
vi-





vinitus concessa sit, non temere utique, sed prudenti cum judicio facienda: Ecclesia etiam jure pollet subtrahendi eadem bona immerentibus; proin & subtractione horum bonorum cogere fideles potest ad obediendum legibus illis, quarum sancendarum & penes Ecclesiam jus est, & penes fideles obligatio parendi.

#### XLV.

Id quod dum agit Ecclesia. *excommunicare* dicitur. Jus igitur ferendi excommunicationem ex instituto manat divino, excommunicatione privatione *Communione Sacrorum* continetur.

#### XLVI-

Unde quos ceteros effectus civiles annexos habet excommunicatio, eos ex Principum consensu habet.

### DE SACRO ECCLESIAE IMPERIO.

#### XLVII.

Quoniam ubi potestas *judiciaria*, *legislatoria*, & *jus cogendi* est, ibi & *Imperium* est; Ecclesiae quoque *imperium* divinitus concessum esse, negari nequit.

#### XLVIII.

Quod tamen quum imperium mere *Sacrum* sit, & intra sphaeram *Sacrorum* contineatur, Majesta-



jestati civili nec quidquam detrahit; & utrumque suo in genere summum manet & independens.

#### XLIX.

Sed & modus admininistrandi Imperii sacri a modo civilis Imperii permultum differt; quippe in quo nullus dominio eminenti, & dominatui, prouti Christus, & Petrus illum excludunt, locus sit, in quo salutem publicam non liceat interitu privatorum conservare, nec pœnas irrogare ejusmodi, quibus quenquam perdat, sed solum quibus pœnitentibus salutem conciliet.

#### L.

Unde facile intelligitur, cur illud *ministerium* similis esse Christus voluerit, & legem Imperii sacri præcipuam possuerit *legem dilectionis*.

#### LI.

Imperium sacrum porro Ecclesia omnium semper splendidissime in Conciliis generalibus exercuit; quorum ut firmior adhuc & inexpugnabilis esset auctoritas, privilegio inerrantiæ in fidei, morumque controversiis determinandis Christus illa munivit.

#### LII.

Quum tamen primis Ecclesiæ seculis Concilia generalia celebrari ob gentilium persecutiones haud possent, a tempore Constantini M. usque ad Ferdinandum I. Imperatorem unum & viginti numerantur Concilia generalia, quorum  
octo





octo priora in Oriente, cetera in Occidente sunt celebrata.

### LIII.

Quæ porro Conciliorum horum definitionibus in rebus fidei, & morum inerrantia competit, non ea ad res Disciplinæ etiam pertinet, de quibus proin cum leges sanciant, mutationi illæ utique sunt obnoxia. Quare videndum semper diligenter, num leges illæ ubivis receptæ, aut abrogatæ iterum, seu consuetudine, seu legibus posteriorum Conciliorum.

## DE FORMA IMPERII SACRI.

### LIV.

Imperium sacrum Christus non quibusvis de populo, sed solis Apostolis contulit, ac inter hos præcipuo quodam modo Petro, ut is & ipforum Apostolorum caput esset, quo ita Ecclesiæ unitas conservaretur. Atque hæc Petri in Imperio sacro prærogativa *Primatus Petri* vulgo appellatur.

### LV.

Quemadmodum autem Imperium sacrum non intra fines *nudi directorii*, aut sola prærogativa honoris consistit: ita & illud, quod in ipso hoc imperio peculiare Petro præ ceteris Apostolis datum fuit, id est *Primatus Petri*, *Primatus auctoritatis & jurisdictionis* sit oportet.

### LVI.



## LVI.

Quumque instituti hujus Primatus causa finisque omnis in eo esset, unitas ut conservaretur in Ecclesia: sane non is merum Petri privilegium *personale* fuit, sed *reale*, in Ecclesiæ commodum perpetuo impertitum, perinde ac reliquum Imperium sacrum Apostolis concessum.

## LVII.

Quamobrem regimen Ecclesiæ, quale quidem divinitus institutum accepimus, haud *mere* est *monarchicum*, sed *aristocratia temperatum*.

## DE SOCIETATE ECCLESIAE INÆQUALI, SACRAQUE IN EA HIERARCHIA.

## LVIII.

Ex constituto divinitus in Ecclesia Imperio recte consequitur, Ecclesiam esse societatem *inequalem*, & Rempublicam quandam sacram, in qua nempe sint alii, qui imperium exercent, alii, quorum sita in obediendo gloria.

## LIX.

Immo quoniam præter Primatum Petri, quo unus ceteris eminet, alii adhuc in Ecclesia sunt, quibus portio varia, varique potestatis sacræ gradus qua divino, qua ecclesiastico instituto concessi sunt: in Ecclesia ordo quidam, & subordi-



ordinatio inter ipsos Imperantes sacros, id est quædam *Hierarchia* viget, divino partim, partim ecclesiastico instituto promanans.

## LX.

Dispersitur illa vulgo in hierarchiam *Ordinis*, & hierarchiam *jurisdictionis*. Prior eorum, quorum magis in *ministerio*, hæc vero quorum in *jurisdictione* magis potestas elucescit, seriem complectitur.

## LXI.

Ac quam quidem instituto divino accepimus, hierarchia, *Episcopis*, *Presbyteris*, & *Ministris*, seu *Diaconis* absolvitur.

## LXII.

Ceteros gradus Ecclesia suo sive instituto, sive moribus cœtuum adjecit; scilicet ad *hierarchiam Ordinis* *Subdiaconos*, *Lectores*, *Ostiarios*, *Exorcistas*, *Acolythos* &c. Ad hierarchiam *jurisdictionis* *Metropolitans*, seu *Archiepiscopos*, *Patriarchas*, *Cardinales*, *Archipresbyteros*, *Primicerios*, *Præpositos*, *Decanos* &c.







## PARS II.

### DE JURIBUS IMPERANTIIUM IN ECCLESIA.

---

#### DE JURIBUS SUMMI IN ECCLE- SIA PRIMATIS, ROMANI PONTIFICIS.

##### LXIII.

Postquam divus Petrus Ecclesiæ Romanæ regendæ immortuus est, quotquot post illum rite electi eidem Ecclesiæ præsunt Episcopi, eos & jure, & merito universa Ecclesia etiam Petri in Primatu successores agnoscit.

##### LXIV.

Primatis hujus jura ut sunt hodie multi-  
juga, ita non omnia uniusmodi. Sunt alia *es-*  
*sentialia*, seu quæ *institutione divina* compe-  
tant, quo refertur 1. jus petendarum, recipien-  
darumque relationum & appellationum ad ser-  
vandam unionem fidei. 2. In terminandis  
fidei controversiis *partes ejus* inter ceteros  
Episcopos *præcipue*. 3. Jus convocandi Con-  
cilia, iisque præsidendi, celebrataque confir-  
mandi. 4. Jus primario defendendi causas fi-  
dei. 5. Jus tutandi, vindicandique observan-  
tiam canonum per omnes Ecclesias. 6. Jus  
ferendi *leges disciplinares universales*, quæ ta-  
men ut ubivis obligent, promulgationem earum  
in



in singulis diœcesibus per Episcopos diœcesanos faciendam, accedere oportet, neve juribus singularibus Ecclesiarum, aut Regnorum sint contrariæ. Unde quali polleant auctoritate *Libri Decretalium, Clementinæ, Extravagantes, Decretum Gratiani*, nec non Curia Romanæ tribunalium declarationes & sententiæ, facile intelligitur. 7. Jus relaxandi canones Conciliorum etiam generalium in casibus particularibus, in quibus nempe Concilia ipsa legis gratiam facerent secundum dispensationum regulas in Conciliis præscriptas. 8. Jus devolutionis supremum, quo Pontifex Romanus desciscentes ab officio Prælatos, ad muneris expletionem revocare, & ita negligentiam eorum supplere valeat, salvis tamen *devolutionibus intermediis*.

## LXV.

Alia jura Primatus sunt *accidentaria*, seu quæ non divino promanant instituto, sed aliunde accessere, & ferioribus temporibus Pontifici Romano reservata sunt; quo pertinent 1. Jus *confirmandi* Episcopos; 2. Jus eosdem consecrandi, 3. transferendi, 4. Jus admittendi resignationes Episcoporum, 5. Jus exauctorandi Episcopos, 6. Jus erigendi novos Episcopatus, 7. Jus uniendi, dividendique Episcopatus, 8. Jus beatificandi & canonizandi, 9. Jus approbandi, tollendique instituta Religiosorum Ordinum &c.



## LXVI.

Ad neutram jurium istorum classem potestas illa Pontificis pertinet, quam vulgo *indirectam in temporalia Regum* vocant, & qua ille etiam *de temporalibus Regum* præcipere, ac eos Regnis etiam multare possit, si Ecclesiæ salutique animarum noceant. Tantum enim abest, ut hæc Pontifici Jure aliquo competat, ut etiam spiritui Ecclesiæ contraria sit.

## LXVII.

In fidei, & morum quæstionibus summi Pontificis inter ceteros Episcopos præcipuæ sunt partes, ejusque decreta ad omnes, & singulas Ecclesias pertinent.

DE CETERIS ROMANI PONTIFICIS PRÆTER PRIMATUM DIGNITATIBUS, AC INDE MANANTIBUS JURIBUS.

## LXVIII.

Præter Primatum Pontifex Romanus dignitate *Patriarchatus* per universas Occidentis Ecclesias fulget. Sustinet ad hæc personam *Primatis*, seu *Exarchi* totius Italiæ. Præest simul tanquam *Metropolita* Provinciæ Romanæ, quæ non centesimo ab urbe Roma lapide, ut Salmasio & Gothofredo visum, continebatur, sed *regiones decem suburbicarias* olim comple-





plectebatur. Est denique *Episcopus Urbis Romæ*, ac ita juribus gaudet potestatis diœcesanæ in paræcia Romana.

DE SENATU ROMANI PONTIFICIS  
CARDINALITIO, HUIUSQUE JURIBUS.

LXIX.

Quum olim nomen *Cardinalis* commune esset ministrorum Ecclesiæ, qui alicui Ecclesiæ perpetuo addicti, & velut *incardinati* erant, ut perinde secernerentur ab iis, qui jure fiduciario & nomine administratorio Ecclesiis ad tempus præsciebantur: tandem solis illis nomen hoc reservatum est, quibus post Nicolai II. tempora eligendi Pontificis potestas commissa.

LXX.

Coaluere hi postea in peculiare Collegium Cardinalitium, & in brevi splendidissimis aucti sunt decoribus & juribus. Ac decora quidem consistunt in proedria, qua Episcopos quosvis, Archiepiscopos, ac Patriarchas antecedunt — in veste & galero purpureis — in titulo *eminentissimi*. Jura autem: quod primos agant Pontificis Consiliarios — præcipuis Romæ præfint *Congregationibus* — fungantur munere *Prote-*  
*ctorum* ad curanda negotia Regnorum & Prin-



cupum — vocentur ad generales Ecclesiæ Synodos, in quibus ex jure consuetudinario voto gaudent *decisivo* — sede vacante fungantur Imperio civili & politico in omnibus Ecclesiæ Romanæ provinciis — gaudeant denique jure eligendi Pontificem *privative*.

## DE CURIA ROMANA, VARIIS- QUE SUMMI PONTIFICIS TRIBU- NALIBUS.

### LXXI.

Postquam Tribunalibus forma judiciorum civilium, atque tritura forensis in Ecclesiam per Pontifices est introducta, *Ecclesiæ Romanæ* etiam *Curia Romanæ* additum nomen est.

### LXXII.

Pro immensa quasi negotiorum multitudine plurimas quoque illa veluti curias minores complectitur, inter quas *Consistorium Cardinalium* eminet. Ceteræ ad duo veluti summa genera referri solent, ut primum genus sit earum, quæ negotiis *contentiosis*, alterum illarum, quæ mere *gratiosis* negotiis curandis destinatæ sunt.

### LXXIII.

Curiarum harum potestas etsi tum ex se se, tum relate ad regiones varias, varia est, haud tamen major esse potest, ac sit Romani Pontificis, cuius illa nomine exercetur.

DE



DE LEGATIS ET VICARIIS  
SEDIS APOSTOLICÆ.

LXXIV.

Missio Legatorum etſi conſectarium eſſe videatur juris *ſupremæ & generalis inſpectionis*, quod Pontifici pro unitate fidei, ac bono diſciplinæ Eccleſiaſticæ per univerſam Eccleſiam competit, & etſi ſeculis Eccleſiæ anterioribus reapi'e miſſi ſunt ſeu ad Concilia generalia, ſeu ad aulas Imperatorum, aut Eccleſias particulares non infrequenter Legati Pontificii: tamen crebriores longe evaſere hæ Legationes, & a prioribus poteſtate, modoque procedendi plurimum diverſæ, ſeculo IX. ac ſpecialim a temporibus Nicolai I. Pp.

LXXV.

Quare Legatis his modus poſtea poſitus, datæque primum leges, quæ expenſas, & procuraciones moderarentur, ac poteſtas eorum demum acciſa eſt ſanctionibus Conciliorum Conſtantiensis & Baſileenſis, *Concordatis Germaniæ*, ac denique in ſynodo Tridentina.

LXXVI.

Quamobrem & Legatorum modernorum, quorum tria habemus genera, jura & poteſtas non ex jure *Decretalium*, ſed ex decretis Concilii Tridentini potius, ex *Concordatis Germaniæ*, ac maxime ex moribus, uſuque hodierno determinanda.





DE PATRIARCHIS , EXARCHIS,  
PRIMATIBUS ET METROPOLITIS.

LXXVII.

Quatuor hi dignitatum Ecclesiasticarum gradus non divinæ sed humanæ institutioni natales debent suos.

LXXVIII.

Initio tres solum in Ecclesia Patriarchæ numerabantur , *Romanus* , *Antiochenus* , & *Alexandrinus* , quibus demum additi *Constantinopolitanus* & *Hierosolymitanus*.

LXXIX.

Et si vero Patriarchæ hi illustribus semper præ ceteris Episcopis splenderent juribus , jurium tamen horum omnium , aut saltem plurimorum enumeratio omnium primum in Concilio generali VIII.prehenditur can. XVII. XXI. & XXVI.

LXXX.

Præter hos quinque Patriarchas *maiores* , alii quidam *Patriarchæ minores* medio Ecclesiæ ævo creati , quales hodiernum quatuor suspicimus , *Venetum* , *Lusitanum* , *Indiarum* , & *Ciliæ in Armenia*.

LXXXI.

*Primates* in Ecclesia dicuntur , quorum jurisdictionis in plures provincias , earumque Metropolitanos sese exporrigit. Quorum jura ut olim  
plane



plane erant insignia, veluti jus convocandi, & ordinandi inferiores Metropolitae &c., ita illi hodie præter titulum vix quicquam habent præcipui.

#### LXXXII.

*Metropolitanarum* dignitas moribus primum introducta, Conciliorum dein Canonibus stabilita fuit, veluti Concilio Nicæno. I. can. 4. & 6. &c. Quemadmodum enim civitas, quæ Metropolis civilis erat cujusdam Provinciæ, ceterarum ejusdem provinciæ urbium caput salutabatur: ita pedetentim, ac liberis moribus effectum, ut qui Episcopus urbis Metropolis esset, ceterorum etiam in eadem Provincia Episcoporum caput evaderet Præsesque; dictus idcirco *Metropolita*.

#### LXXXIII.

Jura metropolitana vel *honoris* sunt, vel *jurisdictionis*. Illa absolvuntur jure proedriæ, seu primæ sedis ante ceteros Provinciæ Episcopos — jure præferendæ crucis Archiepiscopalis — ac jure pallii, cujus quidem pallii origo nondum satis est eliquata.

#### LXXXIV.

Hæc autem quum olim essent amplissima, imminui cœpere jam inde a seculo IX. & deinceps, ad Tridentinumque Concilii tempora. Ac inter cetera, quæ eis adempta sunt, omnium



maxime duo eminebant, jus nempe *confirmandi Episcopos*, ac *judicandi* eorundem causas majores, depositione vel degradatione dignas. Quorum illud in *Concordatis Germaniæ*, istud in Synodo Tridentina soli fuit Pontifici stabilitum, quamquam jam antea de Episcoporum criminalibus causis judicium Romano Pontifici esset reservatum.

## LXXXV.

Hodie itaque jurisdictio Metropolitaram in suos suffraganeos huc fere redit; ut 1. supplere possint ac debeant negligentiam Suffraganeorum tum in provisione beneficiorum, tum in administratione etiam justitiæ, saltem si causa aliqua per *appellationem* ad Metropolitanum devolvitur. 2. Ut Metropolitanus sit, scripto approbare causas absentiae suffraganeorum a suis diocesis. Et 3. eosdem, qui ab elapso jam anno non resident, Pontifici denuntiare. 4. Ut suffraganeos in erigendis seminariis desides corripiat. 5. Ut tertio quoque anno Concilium Provinciale indicat. 6. Ut visitare quidem dioceses suffraganeorum possit, *ast non nisi causa cognita & probata in concilio provinciali*; unde & jus hoc hodie ferme inutile effectum, dum synodorum provincialium celebratio in desuetudinem abiit.

## LXXXVI.





## DE JURIBUS EPISCOPORUM.

## LXXXVI.

Potestas Episcoporum originis & instituti divini est.

## LXXXVII.

Hac illi Presbyteris superiores sunt, hancque non a Romano Pontifice, sed proxime a Deo nanciscuntur.

## LXXXVIII.

Quare & diœceses suas regunt nomine & jure non quodam *vicario* Pontificis, & *beneficio alieno*, sed *jure proprio*, tanquam veri nominis hierarchæ a Deo instituti, subordinati tamen Pontifici ceu Primati universæ Ecclesiæ.

## LXXXIX.

Potestas igitur eorum, qua suis præsent diœcesibus, *plenaria* est & *solida*, ac *ordinaria*; cujus cum pars præcipua sit præficere Pastores inferiores, in quos curam pastorem secure partiantur, collatio quoque beneficiorum ad eosdem jure pertinet.

## XC.

Pertinet ad plenariam & solidam Episcoporum potestatem etiam jus visitandæ diœcesis; quam visitationem singulis annis ab Episcopis institui; aut si ob diœcesis latitudinem intra annum



num explere nequeant, biennio saltem absolvi  
voluit Synodus Tridentina.

## XCI.

Ex potestate imperii sacri, quod Christus  
Apostolis contulit, etiam Episcopis ceu eorum  
successoribus potestas *legislatoria, judiciaria,*  
& *coactrix* competit; quam exercere possunt  
seu extra, seu in synodo diœcesana, ad quam  
diœcesis suæ Clerum convocare possunt.

## XCII.

Collectorum in Conciliis generalibus Epi-  
scoporum nobilissima certe prærogativa est in-  
errantia illa & infallibilitas in determinandis  
*rebus fidei, & morum.*

## DE EPISCOPIS GERMANIÆ.

## XCIII.

Duo maxime peculiarem Episcoporum Ger-  
maniæ mentionem exigunt, insignis illa potestas  
civilis (*superioritatem territorialem* vocant: )  
quam Episcopi Germaniæ conjunctam cum sa-  
cerdotio tenent; ac dein mutatio, quam eo-  
rundem jurisdictio ecclesiastica in pace West-  
phalica subiit.

## XCIV.

Nimirum Jurisdictio eorum Ecclesiastica  
in *Protestantes* suspensa est in pace *Religiosa*  
primum quoad aliqua solum capita, ac de-  
mum



mun penitus in Pace Westphalica, tribus duntaxat adjectis casibus exceptis. Quorum primus est: *ad consequendos tamen redditus, census, decimas, & pensiones in iis Augustanæ Confessionis statuum ditionibus, ubi Catholici anno millesimo sexcentesimo vigesimo quarto notorie in possessione vel quasi exercitii Jurisdictionis Ecclesiasticæ fuerunt, utantur eadem posthac quoque, sed non nisi in exigendis hisce pensionibus, nec procedatur ad excommunicationem, nisi post tertiam demum denuntiationem Catholicorum.* P. W. Art. V. §. 48.

## XCV.

Alter hisce continetur: *Augustanæ Confessionis addicti status Provinciales & subditi, qui anno MDCXXIV. Ecclesiasticam jurisdictionem agnoverunt, in iis casibus modo jurisdictioni dictæ subsint, qui Augustanam Confessionem nullatenus concernunt, modo ipsis occasione processus nihil injungatur Augustanæ Confessionis vel conscientiae repugnans. Tertius denique mox subnectitur his verbis: Eodem etiam jure Augustanæ Confessionis Magistratum catholici subditi censeantur, inque hos qui anno MDCXXIV. publicum Religionis Catholicæ exercitium habuerunt, Jus diæcesanum, quatenus Episcopi illud dicto anno quiete in eos exercuerunt, salvum esto.* §. cit.

DE





## DE EPISCOPIS TITULARIBUS, ET COADJUTORIBUS EPISCOPORUM.

### XCVI.

Episcoporum titularium natales vetus Ecclesia ignoravit.

### XCVII.

Qui etsi veri sunt Episcopi, diœcesi tamen cum careant, sitque potestatis Episcopalis exercitium ad diœcesim adstrictum : exercitio potestatis Episcopalis destituuntur, nisi in quantum ab aliis Episcopis diœcesanis ad præstandum subsidiarias in curanda diœcesi operas adsumuntur.

### XCVIII.

Coadjutores Episcopi dantur a summo Pontifice etiam ad succedendum, salvis tamen juribus *nominatiois*.

## DE CANONICIS, ET CAPITULORUM CATHEDRALIUM JURIBUS.

### XCIX.

Cum jam inde ab Ecclesiæ primordiis Episcopi sua haberent *Presbyteria*, seu senatum quemdam Ecclesiasticum, cujus opera et consilio in rebus majoris momenti uterentur : Seculo octavo vitam illi communem agere cœperunt secundum Credegandi Metensis Episcopi regulam monasticis institutis multum assimilem.



## C.

Et si verò hoc vitæ institutum postea iterum abiecerant, mansere tamen hodiernum coadunati in *Collegia*, seu in Congregationes Ecclesiasticas de vita ex certa regula, & statutis agenda, divinisque officiis communiter in Ecclesia peragendis. Quæ si ex Clericis ecclesiarum *Cathedralium*, *Capitula cathedralia*; sin ex Clericis aliarum ecclesiarum *inferiorum non cathedralium* constent, *Capitula ecclesiæ collegiatæ* vocantur.

## CI.

Ex quo autem bona Episcopi a bonis Capituli sejungere, corpus formare ab Episcopo separatum, ac denique reditus Capituli inter se partiri cœperunt Canonici, jura etiam & Prærogativas singulares pedetentim acquisivere, quæ tamen non sunt ubivis unius modi.

## CII.

In Germania certe prærogativa illorum splendidissima est jus, quod habent, liberum eligendi Episcopos & Archi-Episcopos, qui S. R. I. Principes simul sint & Electores.

## DE VICARIIS EPISCOPORUM.

## CIII.

Functionibus vice Episcopi obeundis, constituti olim *Archipresbyter* & *Archidiaconus*.

## CIV.



## CIV.

At his dum postea sola fere præeminentia cum titulo relicta est, Episcopi jam inde a seculo XII. Vicarios peculiare, alios quidem *Officiales*, ad jurisdictionem *contentiosam*, alios *Vicarios in spiritualibus* ad partes jurisdictionis *voluntariæ* in Diœcesi exercendas, instituere cœperunt.

## CV.

Quare quum hi Vicarii potestatem suam beneficio alieno teneant, & illa adeo ex terminis Commissionis mensuram capiat suam: ex usu potissimum singularium diœcesium, quanta potestate polleant, discendum est.

## DE PAROCHIS.

## CVI.

*Parœcia* olim diœcesim, hodie diœceseos partem duntaxat indicat, cujus incolæ cœtum quendam minorem de Deo per sacra Christiana colendo constituunt sub regimine Presbyteri, qui & *Parochus* audit.

## CVII.

Institutione divina existit jam inde ab Ecclesiæ Christianæ initiis Presbyteri quidam inferiores, seu secundi ordinis, qui sub regimine Episcoporum cœtibus Christianorum præessent, a quibus quoniam ii, quos hodie Parochos





chos vocamus, nihil differunt, si pauca sejungas, quæ recentior Ecclesiæ disciplina addidit, divinæ quoque illi institutionis sunt, si rem ipsam spectes, & substantiam; quo sensu & potestatem suam proxime a Deo obtinent, quæ ordinaria est, non vicaria tantum & mere delegata.

### CVIII.

Inde jura & Officia Parochorum promanant sequentia 1. jus administrandi Parochianis Sacramenta, Ordinis & Confirmationis excepto. 2. Jus habendi fontis baptismalis & tribunalis pœnitentiæ. 3. Jus & munus prædicandi verbum DEI & 4. imbuendi fidei sanctiorisque vitæ rudimentis juventutem. 5. Pauperum aliarumque miserabilium personarum curam paternam gerendi, ac bonorum omnium operum exemplo pascendi. 6. Jus habendi cœmeterii, defunctosque sepeliendi. 7. Delegandi potestatem suam alteri Sacerdoti idoneo, & ab Episcopo approbato. 8. Residendi intra paræciæ suæ limites &c.

### CIX.

Cum autem Parochi in inferiorum Pastorum numero veniant, certis tantum diœceseos districtibus sub regimine Episcoporum præpositi, satis intelligitur, cur 1. eorundem jurisdictionis ad forum contentiosum se non exporrigat. Cur 2. censuras infligere, easdem tollere

*Synop. Jur. Eccl.*

C

in



in foro externo, aut lites decidere nequeant. Nec 3. legibus ecclesiasticis quenquam solvere, aut legis gratiam facere in impedimentis Matrimonii, in votis &c. nisi quantum id eis ab Episcopo speciatim concessum. Neque 4. a casibus Episcopo reservatis in sacro poenitentiae tribuendi abolvere. Cum denique 5. muniis Parochialibus intra paræciæ suæ limites, non vero in aliena Parochia, sine Parochi ordinarii consensu, vel Superioris concessione defungi valeant.

## DE CLERICORUM JURIBUS ET PRÆROGATIVIS COMMUNIBUS.

### CX.

Hæ ad duo summa genera revocantur, ad immunitatem ecclesiasticam *personalem*, & *realem*, quorum illa 1. privilegium *Canonis* quod vocant, 2. privilegium *fori*, 3. privilegium *servitiorum*, & 4. privilegium *competentiæ* complectitur.

### CXI.

Privilegio *Canonis* excommunicatio major continetur, lata in notorios Clericorum percussores. de quorum tamen percussione inquisitio facienda ab utraque, Ecclesiastica & civili potestate. \*)

### CXII.

---

\*) Rescript. Casareo-Reg. de a. 1768. 16. Julii & 29. Aug.



## CXII.

In *causis* quidem *sacris*, quemadmodum Clerici foro civili non sunt obnoxii: ita in ceteris *civilibus* causis quidquid exemptionis, quam *privilegium fori* vocant, habuere, aut habent etiamnum, Regum ac Principum concessioni referendum in acceptis.

## CXIII.

Privilegium *servitiorum* Clerici exempti sunt servitiis ita ut Clericali minus convenientibus, ut sacris vacare magis possint. Quare inter cetera etiam a *militia* exempti sunt, nisi forte patria defendi non posset, quo casu *juri sequele*, quod Regibus ceu confectarium ex jure belli competit, etiam Clerici sunt obnoxii.

## CXIV.

Privilegium *Competentiæ*, quo Clericis non habentibus, unde creditoribus satisfaciant, salvam esse oportet sustentationem statui eorum congruam, ex observantia diuturna æquitate subnixâ, repetendum.

## CXV.

Prima *immunitatis realis* initia Constantino M. debet Ecclesia. Cumque initio varia esset ea immunitas, modo auctior, modo contractior, pedetentim a seculo undecimo usque eo crevit, ut etiam ad possessiones *patrimoniales & privatas Clericorum* extenderetur. Posteaquam



enim ex falsis *Isidori* decretalibus semel creditum est, Clericos civili jurisdictioni nequaquam subiacere, idque instituto divino; proclive fuit, ut etiam a tributorum præstatione, quæ subjectionis illius signum esset, liberi crederentur eodem jure. Prædia porro Clericorum, ac possessiones eorum, tanquam *accessoria personæ* tum spectabantur; igitur & has tributis minime obnoxias esse, velut suoapte consequi videbatur secundum vulgarem regulam : *accessorium sequitur principale.*

## CXVI.

Ita quidem olim philosophabantur. At hodie Philosophia, quæ majoris gratitudinis sit, utimur, & quantulumcunque immunitatis realis superest, illud ex beneficio Principum habere nos, grati recognoscimus.

## DE CLERO REGULARI.

## CXVII.

Inter hierarchiæ ecclesiasticæ gradus, quos suo Ecclesia arbitrato adjecit, dignitas quorundam *superiorum Regularium*, veluti *Abbatum*, *Ministorum Generalium* &c. numeratur, quippe quibus præter potestatem paternam etiam pars *potestatis ecclesiasticæ* in præsens competat.

## CXVIII.





## CXVIII.

Qui vitæ monasticæ institutum, quod seculo Ecclesiæ quarto invaluit, sequebantur, etsi olim Clericorum numero non censerentur, Abbatum tamen, qui eis præerant, non vilis in Ecclesia auctoritas semper fuit. Et sicut postea Cœnobitæ ad statum Clericalem universim elevati sunt: ita Abbates a medio seculo undecimo ornamentis Pontificalibus ornati, præcipua quadam *dignitate ecclesiastica post Episcopos* hodiernum resurgent.

## CXIX.

Quare ad concilia generalia vocantur, in iisque jure suffragii potiuntur — Cœnobitis suis minores conferre ordines possunt — nec non benedicere vasa sacra &c.

## CXX.

Exemptiones Monasteriorum a potestate & jurisdictione Episcopi diocesani, quæ ante seculum undecimum vix occurrunt, auctæ permultum sunt, postquam seculo decimo tertio novi invalere Regularium ordines, ex modo vitæ quærendæ dicti *Mendicantes*. Quorum quum nimium cresceret numerus, admissio & adprobatio novi ordinis Religiosi Pontifici eodem seculo est reservata; ad quem proinde etiam jus tollendi Ordines Regulares pertinere existimatum est.



## CXXI.

De exemptionibus autem Regularium cum sæpe querelæ ortæ, sæpe etiam modus iis est positus, tum novissime in Concilio Tridentino, ut via quadam media res complanaretur, concessum Episcopis, ut saltem qua *Sedis Apostolicæ Delegati* jurisdictionem in exemptos exercere certis casibus valeant. *Trident. sess. 6. de reform. c. 3. Sess. 25. cap. 14. sess. 7. c. 15. sess. 22. c. 8. & 9.*

## CXXII.

Qua ipsa tamen Tridentini sanctione quoniam non tam nova quædam concessa, quam vetus potius & avita Episcopis restituta est auctoritas (solum enim obstaculum remotum fuit, quod potestati eorum posuerat exemptio) profecto delegatam illam a synodo Tridentina jurisdictionem æquivalere jurisdictioni *ordinariæ*, & adeo *latioris esse interpretationis* censendum est.

## DE MODO PERVENIENDI AD DIGNITATES ECCLESIASTICAS.

## CXXIII.

In Ecclesia sua usque in finem mundi duratura, etsi divinus ejus institutor Christus semper quoque voluerit esse aliquos, qui sacro, quod in illa instituerat, præessent imperio: quo tamen  
illi



illi modo ad id muneris feligendi essent & vocandi, nuspiam constituit.

#### CXXIV.

Sed neque ab Apostolis ulla hanc in rem lex edita, & quod hoc in negotio subin egerunt ipsi, non est uniusmodi.

#### CXXV.

Ab eorum morte, Episcopi fere ubivisa vicinis Provinciæ Episcopis eligebantur, Clero simul, populoque in suffragii partem vocato.

#### CXXVI.

Quoniam vero populus non raro turbas concitabat, paulatim is ab electione removeri cœpit, admissis tantum optimatibus & honoratioribus.

#### CXXVII.

Quæ res fecit postea, ut & Regibus plurimum tribueretur in electionibus, quippe qui præ Optimatibus multo plus valerent ad commoda Ecclesiarum promovenda, ad electionum compescenda diffidia, ac prætensiones malevolorum reprimendas.

#### CXXVIII.

Peractæ electioni postea sub stirpis Carolinæ & Saxonix Regibus, cum Episcopi Germanix *Regalia* non pauca possiderent, addita investitura est *per anulum & baculum*; ob quam dein ortum sub Gregorio VII. Pp. diffidium Pontifices inter & Imperatores, quod annis pro-



pemodum quinquaginta Ecclesiam æque ac Imperium vehementer affluxit, *transactione Calixtina* demum extinctum. Utque reddita Ecclesiæ Imperioque pax esset firmior, etiam jure *Regalia & spolia* se se abdicavere Imperatores.

## CXXIX.

Novam electiones Episcoporum faciem accepere seculo XIII. dum *Capitula cathedralia* electiones has sibi solis attribuerunt; quod ius moribus initio quæsitum, postea & Pontificum & Imperatorum constitutionibus est confirmatum, imminutum tamen rursus per Pontifices maxime Avenione residentes, qui reservationes Episcopatum permultum auxerant.

## CXXX.

At restitutum illis rursus, quantum ad Germaniam per *Concordata Germaniæ* est a. 1448. quibus *libera & canonica* Archiepiscoporum, Episcoporum, & Abbatum electio Capitulis metropoliticiis, cathedralibus, & monasticis confirmata fuit, reservato solum Pontifici jure *conferendi* electos *in ecclesiis Metropolitanis & cathedralibus etiam Apostolicæ sedi immediate non subjectis, & in monasteriis Apostolicæ sedi immediate subjectis.* Concord. Germ. §. 3. Qua electionum libertate perfruitur Germania etiamnum.

## CXXXI.





## CXXXI.

Facienda autem hæc electio est secundum formam in *cap. XLII. de Elect. & Electi potest.* præscriptam.

## CXXXII.

Alter post electionem modus perveniendi ad dignitates ecclesiasticas *postulatio* audit, quæ est *electio personæ defectu canonico laborantis, annexam habens implorationem superioris, de eadem persona per dispensationem ad Prælaturam admittenda.*

## CXXXIII.

Quare cum *postulatio* reipsa electio sit, diversa ab illa duntaxat in eo, quod annexam habeat implorationem superioris de concedenda dispensatione; relinquitur, ut forma electioni præscripta servanda itidem in *postulatione* sit; & adeo pro *postulato* habendus sit ille, in quem *major* Capituli pars consenserit, nisi fors pars Capituli *postulet*, pars *eligat*, quo casu *postulatus* duplo majorem numerum suffragiorum habere debet, quam electus. Secus prævalet electio, dummodo suffragia pro Electo *unam tertiam* personæ *postulatæ* superent.

## CXXXIV.

Unde porro admissio *postulationis* ab eo petenda est, qui jus *confirmandi* habet & *dispensandi* in impedimentis canonicis. Hinc quoniam



niam jus confirmandi Episcopos, & Abbates *immediatos* Pontifici reservatum, etiam jus admittendi eorundem postulationes ad Rom. Pontificem attinet.

#### CXXXV.

Tertius ad dignitates ecclesiasticas perveniendi modus, qui in ceteris fere omnibus extra Germaniam provinciis *electioni* surrogatus est, *nominatio* appellatur, qua Reges & Principes Christiani suis in regnis & provinciis personam designant, cui dignitas ecclesiastica, Archiepiscopatus, Episcopatus, aliave Prælatura a superiore ecclesiastico conferatur.

#### CXXXVI.

Nominatio hæc quum surrogata sit electioni, tandundem quoque juris, ac electio tribuit, estque idcirco dignitas *personæ nominatæ* necessario conferenda, nec potest confirmatio ei denegari, si nominationem canonicam esse appareat.

#### CXXXVII.

Accidit interdum, ut vacanti Ecclesiæ novus Episcopus per *translationem* detur, quæ fit, dum quis dimissa dignitate ecclesiastica, quam tenebat, ad aliam auctoritate superioris promovetur.

#### CXXXVIII.

*Translationibus Episcoporum* etsi vetus Ecclesia magnopere semper intercessit, maxime postquam



postquam seculo IV. Episcopis Arianis pessimo exemplo præeuntibus, ex avaritia & ambitione, nec jam infrequenter translationes quærebantur: admisit tamen interdum aliquas, si nempe auctoritate superioris fierent, essentque ejus generis, ut redundatura ex iis utilitas vulnus, quod tum disciplinæ ecclesiasticæ infligitur, compensatura crederetur.

#### CXXXIX.

Hodie jus transferendi Episcopos Romano est Pontifici reservatum, ususque translationum non infrequens in Italia obtinet.

### PARS III.

#### DE NEXU ECCLESIAE CUM REPUBLICA ET JURIBUS PRINCIPUM CIRCA SACRA.

##### CXL.

Insignis & permagna est Religionis Christianæ ad felicitatem Reipublicæ præstantia.

##### CXLI.

Augetur mirifice hæc præstantia per sacerdotii & Imperii concordiam.

##### CXLII.

Quorum sicut quodque suo in genere est summum, & alterum ab altero independens: ita limites eorundem determinantur. I. ex diver-  
sitate



veritate finium, quorum gratia sacerdotium & Imperium institutum est. 2. ex diversitate mediorum, quæ eis ad consequendos fines suos data sunt, & 3. ex diversitate objecti, circa quod imperium & Sacerdotium occupantur.

#### CXLIII.

Ex determinatione horum limitum consequitur porro, potestati civili *jus in Sacra*, quod in *determinatione sacrorum* situm est, haudquaquam competere; competere tamen jus aliquod *circa sacra*, quod jus ex ipso Imperio civili profluit.

#### CXLIV.

Constititque jus istud in *jure Regio supremæ inspectionis* in ea, quæ in territorio Republicæ aguntur, ne quid detrimenti inde persentiat Respublica: nec non in *jure*, munereque *Patrocinii* ac *Tuitionis* res fidei, disciplinæque Ecclesiæ.

#### CXLV.

Quare vi juris *Patrocinii* ac *Tuitionis* competit Principi jus 1. convocandi certis casibus concilia, 2. coercendi veræ Religionis impugnatores. 3. prohibendi libros noxios. 4. Monendi de canonum observantia. 5. prohibendi, ne Prælati Ecclesiæ bona ecclesiastica alienent.

#### CXLVI.





## CXLVI.

Ex jure Regio autem supremæ Inspectionis competit Principi 1. jus *Placeti Regii*, ut vocant, circa bullas ecclesiasticas. 2. Jus dandi *exclusivam*, quam ajunt, in electionibus Prælatorum. 3. Condendi *legem amortizationis*. 4. recipiendi recursum. & *appelationem ab abusu* 5. jus permittendi civibus a vera religione alienis liberum sacrorum exercitium in calu inevitabilis necessitatis, præcipue avertendi majoris damni Religionis.

## CXLVII.

In Germania exortis sæculo sextodecimo funestimis illis Religionis diffidiis, Principes Protestantici paullo ampliora jura circa sacra sibi sumfere; nimirum sumfere sibi jus veterem religionem possessione dejiciendi, substituendi-que novam, ac determinandi adnexa Religionis, quorum jurium complexus *jus reformandi* vulgo audit.

## CXLVIII.

Jus hoc reformandi a Principibus Protestantibus jam occupatum, in pace Westphalica tandem Imperatori, statibusque Imperii immediatis, Ecclesiasticis non minus, quam secularibus, cum *jure territorii & superioritatis ex commu-*



ni per imperium totum hætenus usitata praxi, comprehensa etiam nobilitate immediata, firmatum fuit.

#### CXLIX.

Adjecta tamen exceptio est, vi cujus omnes & singuli, qui sive *publicum sive privatum Catholica vel Augustana confessionis exercitium* anno 1624. quacunque anni parte habuerunt, illud etiam æinceps retineant cum adnexis, quatenus illa dicto anno exercuerunt, aut exercita esse probare possunt. Quare jus reformati instar regula se habet respectu statuum; subditisque contra illud excipientibus onus probandæ exceptionis incumbit.

#### CL.

Quapropter & dominis territorialibus jus *simultanei innoxii* competit, seu jus introducendi coexercitium Religionis, quæ in *anno regulativo* haud viguit, modo subditi in Religionis exercitio anno normali habito, non impediuntur.

#### CLI.

Qui vero possessione ejusmodi in anno normali non fruebantur, his si diversam a Domino territoriali religionem profiteri velint, nonnisi flebile beneficium emigrationis concessum, quo si uti velint, detineri a Domino territorii nequeant, esto etiam *homines proprii* sint, modo æquum manumissionis pretium solvant.

#### CLII



## CLII.

Possunt tamen hi etiam inviti a Domino territorii cogi ad emigrandum. Unde beneficio emigrationis subditis diversæ religionis concessio, nequaquam sublatum esse *jus transplantandi* eosdem subditos, ex æquali relatione utriusque medii ad finem facile intelligitur.

## CLIII.

Sive autem sponte velint, sive emigrare cogantur, semper eis integrum est *bona vel alienare vel retinere, ac per ministros administrare, libere etiam, si opus, accedere, recedere, nec denegandæ sunt emigrantibus nativitatis, honestæque vitæ testimonia, nec inusitatis reversalibus, vel decimationibus sunt gravandi.* Art. V. §. 36. & 37.

## CLIV.

Denique Ecclesia *Protestantium* una cum illa *Reformatorum* ita in Germania jure civitatis donata est, ut jura illius cum jure Ecclesiæ Catholicæ in Imperio Romano-Germanico sint æqualia, ita ut *quod uni justum est, alteri quoque justum sit.* P. W. art. V. §. I. Art. VII. §. I.

## CLV.

At nihil hæc, quæ de jure reformandi statuta sunt, *ad regna & Provincias Domus*  
Au-



*Austriacæ attinent, quorum intuitu regia Majestas Sueciæ & Augustana Confessionis Ordines sibi nihil aliud reservarunt, quam facultatem apud suam Cæsaream Majestatem, pace tamen semper permanente, & exclusa omni hostilitate, ulterius respectively interveniendi & demisse intercedendi. Art. V. §. 41.*







---

# JUS ECCLESIASTI- CUM PRIVATUM.

---

## PARS I.

### DE PERSONIS ET BENEFICIIS EC- CLESIASTICIS.

#### I.

**E**xposita in *Jure publico Ecclesiastico* natura Imperii sacri, quod Christus Clericis, seu personis Ecclesiasticis concessit, agendum hic de personarum harum ceteris qualitatibus.

#### II.

Clerici quemadmodum Deo, ejusque ministerio singulariter consecrati sunt : ita id ipsum etiam vita sua ostendant oportet. Quare non modo vitæ sanctitatem internam, sed etiam morum probitatem, decoremque externum, qui statui eorum consentaneus sit, consecrari debent.

#### III.

Quo inter cetera etiam vestitus & tonsura Clericalis — vita cælebs — abstinencia ab armis — a mercatura, — a venatione — a genere vitæ fordido — a negotiis secularibus pertinent &c.

*Syn. Jur. Eccl.*

D

IV.



## IV.

Oportet Clericos quoque illimes esse ab iis seu vitiis, seu defectibus, quorum aliquo qui notati sunt, *irregulares* audiunt.

## V.

Irregularitatum genera multa sunt ab Ecclesia statuta, quorum tamen aliquæ nimis extensæ subin fuere a Decretalium commentatoribus, veluti irregularitas ex *defectu lenitatis* quam vocant.

## VI.

Ad vitæ probitatem, ceterasque qualitates in Clero obtinendas, dici non potest, quantum educatio Clericorum in *seminariis*, seu *domibus sacerdotalibus* conferat, quas proin singulis in Diœcesibus erigi synodus Tridentina quam saluberrime iussit sess. 23. cap. 18. de Reform.

## VII.

In primitiva Ecclesia ex communi penu, & massa oblatorum & possessionum pauperiores alebantur Clerici, & fideles.

## VIII.

Seculo V. proventuum omnium *quatuor partes* fiebant, quarum una *Episcopo* & familiæ ejus propter hospitalitatem exercendam, altera *Clero*, tertia *pauperibus*, quarta *Ecclesiis reparandis* cessit. Ruralibus tamen Presbyteris interdum fundi, fundorumque proventus specie  
usus



usufructus dati. Ac quamquam initio fundi isti a morte horum usufructuariorum ad Ecclesiam redirent, essetque in Episcopi arbitrio, an hos, an alios redditus successori dare vellet: postea tamen sive quod Episcopi interdum laicis jure usufructuario eos fundos concederent, sive quod Clericis odiosum videretur & molestum, novis precibus Episcopos pro redditibus adire, invaluit pedetentim, ut Parochi hi rurales jus perpetuum habere crederentur percipiendi proventus intra fines suarum parochiarum provenientes.

## IX.

Et inde *beneficiorum perpetuitas* orta, quæ hodie dum obtinet, dum beneficium ecclesiasticum ex hodierna disciplina *jus est perpetuum percipiendi fructus ex Ecclesiæ bonis ob sacrum ministerium auctoritate ecclesiastica adnexum.*

## X.

Multa hodie beneficiorum genera sunt. Alia *curata & simplicia, secularia & regularia* alia; alia *compatibilia & incompatibilia*, alia quibus *dignitas aut personatus* adnexus &c. Alia denique *electiva & collectiva.*



## DE ERECTIONE ET COLLA- TIONE BENEFICIORUM.

### XI.

Erectio & collatio beneficiorum Episcopatu minorum quemadmodum jure proprio & quasi congenito ad Episcopos diocesanos pertinet, ita decem primis Ecclesiæ seculis, quibus collatio beneficiorum a sacra ordinatione sejuncta non erat, & ipsorum Ordinum collatio vice collationis beneficiorum fuit, omnis quoque beneficiorum collatio apud solum Episcopum remansit.

### XII.

Et quanquam huius in conferendis beneficiis libertas hinc inde parumper imminuta esset, dum seculo octavo & nono invalescente *Jure Patronatus* Episcopi beneficia conferre interdum deberent iis, quos Patroni præsentaverant : at jus ipsum conferendi turbatum demum per *gratias expectativas*, ac *reservationes Pontificias* plurimum fuit, quæ exeunte seculo duodecimo pedetentim inductæ, postea ita auctæ sunt, ut omnium pene nationum Episcopi ac Principes gravissimas querelas moverent, ac iisdem jure intercederent.

### XIII.

Quarum priores Tridentina Synodus sess. 24. c. 19. de Reform. sustulit : his vero per *Concordata Germania* modus est positus. XIV.





## XIV.

*Jus Patronatus* viget etiamnum, contineturque 1. jure præsentandi Clericum ad beneficium vacans. 2. Percipiendi alimenta in necessitate 3. capiendi locum honoratiorem in Ecclesia & solemnibus ecclesiasticis 4. obligatione defendendi Ecclesiam, & ad ejus reparationem concurrendi.

## XV.

*Jus Patronatus* utcumque inter res spirituali annexas *jure Decretalium* referatur, id tamen laud officit, quo minus Christiani omnes, ne feminis quidem exceptis, juris hujus capaces sint, acquirique illud possit aut *modo originario*, & quidem 1. *ordinarie* fundatione, dotatione, exstructione; 2. *extraordinarie* præscriptione, privilegio. Aut *modis derivativis*, successione, donatione, seu etiam una cum castri, vel prædii, cui cohæret, permutatione, & venditione.

## XVI.

Quapropter etsi in causis juris patronatus controversis *jure Decretalium* judex competens sit Ecclesiasticus, eæ tamen in Austria ad *Regimen excelsum*, in Bohemia ad *Curiam Regiam Provinciale* majorem pertinent.



## XVII.

Quis autem cunque beneficia conferat, semper is eam servare debet regulam, *ut homines det beneficiis, non beneficia hominibus*, id est, ut ea non nisi *dignioribus*, & qui Ecclesiæ magis proficui futuri sint, impertiatur.

## XVIII.

Ad quam Regulam proin consentanee intelligenda consuetudo, quæ alicubi inoluit 1. recipiendi Canonicos nobiles tantum. 2. dandi *Exspectativas & Canonicatus in herbis*.

## XIX.

Beneficio obtento variæ tum *obligationes*, tum *jura* in *beneficiato* oriuntur. Ac primum quidem jure divino obligatur is ad rite præstandum *officium* beneficio annexum. Id quod si præstare pro eo, ac oportet, non possit, nisi quoque in loco beneficii resideat, eodem jure ad residentiam in loco beneficii obstringitur, illamque non otiosam, sed diligenti cum officii expletione conjunctam.

## XX.

Quæ obligatio potissimum ad Beneficiatos curatos pertinet, nisi forte officiorum collisio exceptionem a residentiæ necessitate quandoque postulet, id est, ut Tridentina Synodus explicat, *nisi christiana charitas, urgens necessitas, debita obedientia, ac evidens Ecclesiæ vel*  
*Rei.*



*Reipublicæ utilitas aliquos nonnunquam abesse postulent, sess. 23. c. 1. de Reform.*

## XXI.

Ac quamquam olim residentia perpetua exigeretur, jure tamen novo permillum ea in re aliquid; modo absentia spatium singulis annis sive continuum, sive interruptum tres menses non excedat in *Episcopatibus & beneficiis curatis.*

## XXII.

Quoniam porro qui in uno beneficii loco residet, nequit simul residere in alterius beneficii loco, relinquitur, ut quæ lex residere in loco beneficii præcipit, eadem & beneficiorum pluralitatem prohibeat.

## XXIII.

Obtinenti plene beneficium etiam *jus in ipso beneficio* nascitur, vi cuius jure pollet exercendi 1. cuncta *jura beneficii* & spiritualia & temporalia. 2. Exigendi & percipiendi proventus *residentiæ veræ & fictæ* assignatos. 3. *utendi, fruendi* prædiis ecclesiasticis, in beneficium datis.

## XXIV.

Quod tamen de proventibus ultra vitæ honestæ sustentationem superest, impendere is in usus pios obstringitur adeo, ut si in profanos usus erogat, ad refarciendum obligetur.



## XXV.

Quare neque consuetudine effici potest, ut de redivbus superfluis ad cauffas profanas testari Clericis fit integrum; quanquam in foro externo id genus testamentorum tolerentur, ob odium litium, & quod perarduum fit bona superflua beneficialia fecernere a *Patrimonio*, de quo libera illis disponendi testandique potestas est.

## DE RESIGNATIONE BENEFICIORUM.

## XXVI.

Beneficiatus quemadmodum ob *jus in beneficio* privari beneficio non potest nisi in poenam, & ob cauffas in Canonibus expreffas: ita propter *obligationem*, quam contraxit, praestandi *officium* beneficio annexum, abdicare fe beneficio nequit, nisi & iusta cauffa, & Superioris adfit annutus.

## XXVII.

Resignationes autem has *pure* & *sine* adjecta conditione, omnium autem minime in *favorem tertii* fieri oportet, quales recentior primum aetas *contra canones* a feculo XIV. introduxit.

DE





## DE INNOVATIONE BENEFICIORUM.

### XXVIII.

Innovantur beneficia , dum status eorum primævus mutatur , quod fit *unione* , *divisione* , *diminutione* & *retentione* beneficii.

### XXIX.

Ad diminutionem beneficii *pensiones* pertinent , quæ sunt certa reddituum portio ex redditibus collati beneficii alteri solvenda.

### XXX.

Quodsi pensiones hæ *elemosynarum* modo constituentur , id est , si portiones quædam proventuum in unius beneficio superfluæ , in alterius Clerici non habentis , unde vitam honeste toleret , sustentationem impendantur , nihil illæ vitii habent , cum ita ad succurrendum Clericorum indigentium *necessitati* quantæ quantæ comparatæ sint : at aliud a seculo XII. pensionum genus invaluit , quo non modica reddituum pars sine discrimine num superflua esset , Ministris Ecclesiæ eripi , nulla etiam moderatione in parum indigentes profundi poterat. Cui modum saltem posuit Tridentina Synodus , quum ex toto tollere vix videretur concessum.



## XXXI.

In Germania sicut beneficiorum omnium dominium & collatio non creditur Pontifici competere, ita nec jus onerandi pensionibus beneficia. Ac quanquam beneficiis mense papali vacantibus pensiones imponere possit, haud illæ tamen ad successorem transeunt, si postea in mense ordinarii collatoris vacaverint.

## XXXII.

Etiam *Annatis*, quæ sunt *pars reddituum primi anni Pontifici ex recens collato beneficio solvenda*, is est per *Concordata Germaniæ* modus positus, ut de *Ecclesiis Cathedralibus & Monasteriis virorum* solvantur quidem *moderate*: de ceteris beneficiis autem non aliter, nisi si valorem XXIV. Ducatorum excedant; unde dignitates & Canonicatus nullas hodie annatas solvunt, quod omnes ad *valorem duntaxat XXIV. Ducatorum* in Camera Apostolica taxati sint.





---

## PARS II.

### DE REBUS SACRIS ET ECCLE- SIASTICIS.

#### XXXIII.

Ex doctrina *Juris publici Ecclesiastici* de jure determinandi *Sacra & sacrorum exercitium* nullo negotio intelligitur, cuinam jus determinandi *liturgiam, dies festos, & rem sacramentariam Baptismatis, Confirmationis, Eucharistiæ, Pœnitentiæ, Ordinis, Unctionis infirmorum & Matrimonii*; determinandi item cultum Sanctorum, jejunia &c. competat.

#### XXXIV.

Hinc e. g. Ecclesia jure statuendi impedimenta Matrimonii *ut sacramenti*: Princeps jure statuendi impedimenta Matrimonii *ut contractus civilis est*, gaudet.

#### XXXV.

Jure Ecclesiastico Austriaco pro irritis censentur *minorennium* sponsalia sine Curatorum & Magistratus consensu celebrata. \*

#### XXXVI.

Matrimonium in infidelitate contractum per professionem Religionis Christianæ alterutrius Conjugum haud solvitur. DE

---

\*) Rescript. Cæs. Reg. de a. 1753. 12. April.



## DE ECCLESIIS ET DOMIBUS RELIGIOSIS.

### XXXVII.

Ad *res sacras* etiam *Ecclesiæ* pertinent, id est ædes sacræ ad quas fideles sacrorum causa confluunt. Possunt quidem in omni loco fundi preces, Missæ tamen sacrificium non nisi in loco sacro & in mensa consecrata offerendum.

### XXXVIII.

Et quanquam *Ecclesiæ Parochiales* seculo IV. antiquiores vix esse videantur, nec fideles primis *Ecclesiæ* seculis templa habuerint eorum, quæ hodie habemus similia: at certe sui erant vel primis illis Christianis conventuum sacrorum loci, exercitio Religionis speciatim destinati.

### XXXIX.

Auctus postea ita numerus est *Ecclesiarum*, ut Justinianus Imp. legem ferre coactus sit, ne quis *Ecclesias* posthac absque consensu *diocesani Episcopi* ædificet.

### XL.

Vetitum quoque in oratoriis privatis citra consensum *Episcopi* Missam celebrare, aut baptismum administrare.

### XLI.





## XLI.

In Germania in quantum jus concedendi Ecclesiarum erectionem ad *jus reformandi* pertinet, normam specialem habet ex *Lege publica Pacis Westphalicæ*.

## XLII.

Ecclesiæ reficiendæ & restaurandæ *jus & obligatio* penes Ecclesiam est. Quare reficienda illa est 1. ex redditibus ipsius Ecclesiæ, atque adeo 2. ex ipsorum etiam *beneficiatorum* redditibus, si qui congruæ sustentationi supersunt. His deficientibus membra Ecclesiæ, *Parochiani* primum, tum *Patroni* subsidia conferre debent.

## XLIII.

*Ædes Parochianæ* quomodo & a quibus reficiendæ sint, peculiari Rescripto Regio in Bohemia de anno 1770, determinatum.

## DE COEMETERIIS ET SEPULTURIS.

## XLIV.

Jam inde ab Ecclesiæ exordio Majores nostri certis ritibus corpora Christianorum sepelebant, ex quibus ritibus, auctis postea, *sepultura Ecclesiastica* manavit.

## XLV.



## XLV.

Quum autem apud *Romanos* sepultura in urbe jam inde a *XII. Tab.* tempore esset prohibita, morem hunc servarunt & Christiani diuturnum Romæ, tum alibi, donec Christiana religione invalescente, *sedes*, sive sepultura *Apostolorum & Martyrum intra urbes* permitterentur, ædificatis ibidem basilicis Martyrum. Juxta quæ sepulcra quoniam porro & ceteri fideles sepeliri desiderabant, evenit tandem, ut sepulturis non quidem ipsæ Ecclesiæ, sed loca prope Ecclesias designata & concessa fuerint, eaque tam intra quam extra urbes ubicunque Ecclesiæ publicæ, sive parochiales essent exstructæ. Atque inde illorum locorum origo, quæ hodie *cæmeteria* dicimus, quæque hodie sunt *loca publica ad sepulturam unice auctoritate sacra solenniter destinata.*

## XLVI.

Quapropter nova cæmeteria erigi nequeant 1. sine consensu Episcopi; 2. & in terris Augustissimæ Domus Austriacæ sine consensu Principis. \*) 3. Jus habendi cæmeterii jus *Parochiale* est, æque ac jus in eodem sepeliendi.

## XLVII.

---

\*) Rescript. Cæs. Reg. dd. 14. Aug. 1772.



## XLVII.

A seculo X. in ipsis Ecclesiis fideles quidam honoratiores sepulturæ dati. Qua in re quid hodie fieri oporteat, speciali Rescripto Regio de 14. Aug. 1772. determinatum.

## XLVIII.

Oblationes etiam funerarias quales, quantasque tum Ecclesiæ, tum ejus ministris dare oporteat, constitutum itidem Regiis Rescriptis de anno 1751. & 1769.

## XLIX.

In pace Westphalica conventum quidem, *ne quis intuitu Religionis a publicis cœmeteriis, honoreve sepulturæ arceatur.* art. 5. §. 35. At accipi istud non potest de locis, ubi publicum religionis Protestanticæ exercitium non toleratur, in quibus proinde locus est legi ecclesiasticæ, *sepulturam ecclesiasticam* hæreticis neganti.

DE JURIBUS ET IMMUNITATIBUS  
LOCORUM SACRORUM ET RELIGIOSORUM.

## L.

Ecclesiæ cultibus sacris destinatæ non possunt usibus profanis permitti. Quare nec in iis, nec in cœmeteriis quidquam negotiorum exercendum, nec merces, aliæve res ibi de-



deponendæ, nisi urgente summa necessitate in incendijs aut hostium incurfione.

#### LI.

Ob eandem causfam sanctitas externa seu securitas publica specialis data Ecclesijs contra aliorum injurias, quæ si inferantur in iis, graviore poenæ sunt obnoxia.

#### LII.

Sed inter immunitates Ecclesijs datas *jus asyli* celeberrimum est, quo securitas data confugientibus ad Ecclesias, ut extrahi inde nequeant, utcunque scelera morte plectenda commiserint.

#### LIII.

Est itaque *jus asyli* species quædam juris *adgratiandi*. Istud autem quum pars sit juris, quod *vita & necis* dicimus, quodque solis summis Imperantibus civilibus competit, sane ipsius etiam juris asyli concessio ad eosdem imperantes civiles pertinet, quorum imperium civile religio Christiana haudquaquam imminuit. Et possunt profecto & tempora ostendi & tabulæ, quando & in quibus *jus asyli* ab Imperantibus civilibus concessum Ecclesijs, ac quantum illud, & quam vario modo auctum, modo iterum restrictum.

#### LIV.





## LIV.

Ut concederent autem, occasionem præbuere primum *intercessionem Episcoporum*. Cum hi enim optime nossent, plenam cordis conversionem non tam cito fieri solere, intercedebant illi apud judices, faverent vitam longiorem reis, quo pœnitentiæ ecclesiasticæ subjicerentur. Quod cum impetrassent sæpius, generatim tandem concessum, ut reis ad Ecclesiam confugientibus hoc ipso tutis esse liceret, & securis.

## LV.

Quoniam autem pœnitentia illa ecclesiastica, cui subiciebantur, & diuturna tunc erat, & pergravis, periculum non erat, ut asyli concessio fraudi esset reipublicæ, aut homines audaciores redderet in delinquendo.

## LVI.

Jus hoc asyli sane vetustissimum extensum deum ad cœmeteria est, ad Episcoporum habitationes, Monachorumque & Canonicorum claustra.

## LVII.

Sed quum jure divino homicidæ etiam ab altaribus abripi possent ad supplicium, \*) crimina atrocia excepta sunt. Jure Austriaco etiam obærat, qui in fraudem creditorum fugam capiunt, asylo non gaudent.

*Synop. Jur. Eccl.*

E

DE

\*) Exod. XXI, 1



## DE BONORUM ECCLESIASTICO- RUM ACQUISITIONE.

### LVIII.

Quoniam Personæ Ecclesiasticæ in numero civium manent, & Ecclesiæ, ac corpora ecclesiastica communione jurium civilium fruuntur : hinc sunt 1. illa acquirendorum bonorum capacia. 2. Potestate autem civili in acquisitione æque ac alienatione eorundem bonorum subjecta.

### LIX.

Et in acquisitione quidem bonorum legibus civilibus semper usa est Ecclesia præter eam, quæ per *ultimam voluntatem* fit ; de qua ut leges suas ederet, occasionem Justinianus præbuit, dum curam & executionem *piarum dispositionum* Episcopis imposuit.

### LX.

Inde ortæ leges illæ juris Canonici, quibus 1. *in testamentis & legatis ad pias causas* nulla necessaria sit solennitas, modo de ultima voluntate constet sive *per duos testes* : sive *per idoneum instrumentum defuncti*. Et quibus 2. *legata pia* debeantur ex testamento etiam respectu *aliorum* imperfecto. Quæ leges etiam in foro & tribunalibus Germaniæ jure civitatis donatæ sunt.

### LXI.



## LXI.

Jure Austriaco tamen speciali nequunt Clerici conficere testamenta *aliena*, & qui de Clero regulari sunt, ne testium quidem nemo defungi in iis possunt. \*)

## LXII.

Legata *pia* porro non subjacent detractiōni *Falcidiæ*; subjacent autem detractiōni *Trebellianicæ* fideicommissa pia universalia.

## LXIII.

Qui vero ad testandum omnino inhabiles sunt, eos saltem ad *caussas pias* testari posse, nec ex dispositione juris, nec ex natura *piarum* *caussarum* eruitur.

## LXIV.

Quum porro Ecclesia semper acquireret, nunquam alienaret, periculumque esset, ne omnium immobilium, vel majoris partis domina fieret, unde in rempublicam, cuius interest, ut multi fundi sint in commercio, multum incommodi; in Principes vero *ob immunitatem ecclesiasticam* inrens detrimentum redundaret: cum in multis rebus, tum in terris hæreditariis Augustissimæ, Domus Austriacæ, *lex amortisationis* lata fuit, qua novæ im-

E 2

mo-

---

\*) Rescript. Reg. de a. 1771. 4. Sept. & 1772. 25. Julii.



mobiliū acquisitiones communitatibus ecclesiasticis interdictæ sunt, nisi Rex speciatim acquirendi potestatem faciat; quam haud facit, nisi *amortisationis* jus eidem sit præstitum, id est, solum certum pretium de prædio, quod devenit in *manus mortuas*.

## LXV.

De acquisitione etiam mobiliū per terras hæreditarias Austriacas peculiariter sancitum, ut claustra Regularium ab iis, qui per vota solennia se se illis mancipant, ultra summam 1500. fl. acquirere nihil possint. \*)

DE BONORUM ECCLESIASTICORUM  
ADMINISTRATIONE, ALIENATIONE ET PRÆSCRIPTIONE.

## LXVI.

Ut bona Ecclesiarum magis in tuto essent, sancitum, ut quantum ad horum administrationem 1. Ecclesia jure *Minoris censeatur*. 2. Ut bonorum administratores inire quidem possint contractus ad bonorum *conservationem* legitimūque *usum* tendentes, at non eos, quibus *alienatio* inest, nisi adhibita *solemnitate ecclesiastica*.

## LXVII.

---

\*) Rescript. Reg. a. 1771. 26. Aug.





## LXVII.

Sed & consensus *Principis* ad validam alienationem vel maxime requiritur, tanquam *Protectoris Ecclesiarum*, & supremi *Inspectoris* in Republica. \*)

## LXVIII.

Quod si illegitime facta sit alienatio, datum Ecclesiae est non tantum *jus vindicandi* alienata a quovis possessore una cum fructibus, sed & actio *personalis* eidem concessa adversus alienantem ejusque hæredes ad damni illati refarcitionem.

## LXIX.

Contra *Ecclesiam* & *corpora pia* quoad bona eorum immobilia non præscribitur, nisi lapsu temporis *longissimi XL.* annorum.

## LXX.

Jure autem austriaco quum bona ecclesiastica non rite alienata, sine mora Ecclesiae una cum fructibus olim restituenda essent *non obstante quacunque præscriptione*, Leopoldus Imperator postea saltem *centenaria* præscriptionis rationem habere voluit. \*\*)

E 3

DE

---

\*) Rescript. Reg. de a. 1545. Cod. Aust. Tom. I. p. 402. & Landsordnung des Königreichs Böhmen f. 25.

\*\*) Constitutione de anno 1704.



## DE DECIMIS.

## LXXI.

Quum primis Ecclesiæ seculis arbitrio Fidelium relictum esset, quid, quantumve symbolæ conferre ad sustentationem ministerii sacri quisque vellet ineunte seculo quarto Patres hortari fideles cœpere, ut exemplo Reipublicæ Judaicæ *decimas divinarum* rerum ministris persolverent. Hortatibus leges dein additæ: ecclesiasticæ primum seculo sexto: ac civiles etiam octavo seculo a Carolo M. quin imo jure plane divino decimas deberi, sequentibus seculis putabatur.

## LXXII.

Inde porro creditum: causas decimarum omnes ad forum pertinere ecclesiasticum, remque hanc totam ex legibus potestatis ecclesiasticæ, maxime Pontificis esse dirigendam. Unde tot Rescripta Pontificum in causis decimarum, collectioni *Decretalium Gregorii IX. inserta.*

## LXXIII.

Hodie eliquati satis juris est, *decimas* jure divino non deberi, etsi sustentatio congrua ministris Ecclesiæ debeatur, quum nihil æquius, quam ut qui aliorum ministerio se dedit, ab iisdem etiam sustentetur.

## LXXIV.



## LXXIV.

Penduntur tamen hodiernum decimæ in locis non paucis, ex consuetudine *pia Principum voluntate* sustentata; quorum ea sane est auctoritas, ut si Reipublicæ salus posceret *decimarum* usum omnino tollere, atque in ejus locum surrogare alium modum possent, quo congrua sustentatio suppeditaretur Clericis.

## LXXV.

Quare etiam causa decimarum ad judicem civilem tam in Bohemia, quam in Austria pertinent.

## P A R S III.

## DE JUDICIIS ET POENIS ECCLESIASTICIS.

## LXXVI.

Secernenda jurisdictio Ecclesiæ *Essentialis* ab *adventitia*.

## LXXVII.

Illius natura & limites in *Jure Publico Ecclesiastico* expositi. Hæc a sæculo nono, quo jurisdictionis civilis & ecclesiasticæ limites mirifice jam permixti erant, Ecclesiæ advenit.

## LXXVIII.

Advenit autem potissimum r. *ratione peccati*, qua causa etsi civilis, si peccandi subesset periculum, ecclesiasticæ esse cognitionis con-



tendebatur; unde & *denunciatio Evangelica* fluxit. 2. Ex negligentia iudicum laicorum, quæ *supplenda* videbatur per iudicem ecclesiasticum 3. Ex iurejurando negotiis adjecto.

## LXXIX.

Hinc cum *forum* sit *locus exercendæ jurisdictionis*, quousque *forum Ecclesiasticum* se se iure suo *primigenio*, & quousque iure *adventitio* exporrigat, facile intelligitur.

## LXXX.

Fori autem ecclesiastici privilegium largitate Principum Clericis concessum, quum olim ad omnes Clericos, qui tonsuram haberent extenderetur, restrictum illud demum sanctione synodi Tridentinæ ita est, ut fori privilegio *non gaudeant Clerici prima tonsura initiati, aut etiam in minoribus ordinibus constituti, nisi beneficium Ecclesiasticum habeant, aut Clericalem habitum, & tonsuram deferentes alicui Ecclesiæ ex mandato Episcopi inserviant, vel in seminario Clericorum aut in aliqua schola vel universitate de licentia Episcopi, quasi in via ad majores ordines suscipiendos versentur*, Trid. sess. XXIII. c. 6. de reform.

## LXXXI.

Præterea neque hoc fori privilegio fruuntur Clerici nisi si 1. *rei* vice fungantur. 2. in actionibus *personalibus*, non item *realibus*.

## LXXXII.





## LXXXII.

*Forma judiciorum ecclesiasticorum a seculo XII. permultum immutata est. Cum enim primis seculis judicia Ecclesiastica essent instar arbitriorum, exulabant in illis formulæ tribunalium secularium. Sed Seculo XII. formularum ambages, velut agmine facto, totaque tritura forensis in tribunalia Ecclesiastica est introducta, occasionem præbente studio legum civilium, quod tum magnopere deperibant Clerici.*

## LXXXIII.

Inde 1. varia in tribunalibus ecclesiasticis *processus judicialis* exorta genera. *Processus ordinarius — Summarius — criminalis — civilis — primæ — secundæ instantiæ — juris communis — juris particularis &c.*

## LXXXIV.

Inde 2. in jurisprudentia Ecclesiastica doctrina: De libelli oblatione. De citationibus. De contumacia actoris vel rei. De litis contestatione. De dilationibus & feriis. De petitionibus mutuis actoris & rei. De modo & ordine plures causas in judicio pertractandi. De exceptionibus & replicationibus. De litis pendencia. De confessione. De Probationibus. De testibus. De instrumentis. De jurejurando. De præsumptionibus. De sententia & re judicata. De appellationibus, recusationibus & relationibus &c.



## LXXXV.

Possunt lites etiam extra iudicium finire, amica nempe *conventione litigantium*, seu *transactione*, aut *per assumptos arbitros*.

## DE POENIS ECCLESIASTICIS.

## LXXXVI.

Quandoquidem non aliud *jus cogendi* Ecclesiae divinitus concessum est, nisi ut privatione *sacrorum*, id est, eorum bonorum, quæ Deus dispensari per Ecclesiam membris societatis Christianæ voluit, adigere fideles posset: etiam *jus puniendi* Ecclesiae a Christo datum, non ultra *sacrorum* privationem, atque adeo ultra *pœnas spirituales* se se exporrigit.

## LXXXVII.

Illud olim Episcopi in synodis, hodie per *Consistoria diœcesana* exercent; causis Episcoporum criminalibus majoribus Pontifici reservatis. *Trident. sess. XXIV. c. 5. de reform.*

## LXXXVIII.

Juri huic puniendi sicut omnia Ecclesiae membra subjacent: ita cum per illud nihil imminuta sit potestas puniendi *civilis Principum*, manebant huic subjecti etiam Clerici. Sed favore & reverentia Religionis, a foro Republicæ criminali Clericos exemptos voluere Principes,  
causis

caussis Clericorum criminalibus *discussioni ecclesiasticae* relictis \*)

### LXXXIX.

Etiam fori hujus *criminalis privilegiati forma* admodum simplex erat quamdiu forum *internum* ab *externo* separatum non fuit. At ubi seculo XII. forum pœnitentiæ in praxi separari coeptum a judiciali, atque istud quidem primario alicui presbytero, ceteris dominaturo, quem *Vicarium Episcopi* seu *Officialem* vocarunt, illud vero inferioribus, & *vilioribus Presbyteris* demandatum est: simplex illa forma in formularum ambages, tricasque forenses mutata: processus denique civilis solennissimus in judicia criminalia ecclesiastica est introductus;

### XC.

Isque triplex; *accusatorius*, *inquisitorius* & *denuntiatorius*.

### XCI.

*Purgationes* tamen *vulgares*, quæ vulgo per *Ordalia*, seu *judicia Dei* fieri dicebantur nusquam probabantur Pontificibus, qui in earum locum *purgationem canonicam* seu *juramentum purgatorium* substituere.

### XCII.

Ad hoc forum ecclesiasticum *adventitium* etsi olim etiam laicorum delicta frequentissime *pertra-*

---

\*) Confit. Crim. Theres. Art. XIX. §. 20.



pertraherentur, hodie foro ecclesiastico regulariter delinquentes laici non subsunt, præterquam eo in casu, dum decisione alicujus questionis præjudicialis mere spiritualis opus, quo casu reus ad judicium ecclesiasticum sistendus, ac pro re nata incuriis laicis per commissarios ecclesiasticos examinandus est. Decisa questione spirituali, processus criminalis a judice laico privative peragendus est. Atque idem etiam agendum, si qualitas criminis jam definita & notoria est. Constit. Crim. Theres. Art. XIX.

#### XCIII.

Jus cogendi porro & puniendi Ecclesia in-  
spectione censurarum exercet.

#### XCIV.

Censuræ ergo in plurimum vel pauciorum bonorum spiritualium privatione consistunt.

#### XCV.

Quarum maxima, & quæ omnibus his bonis privat, *excommunicatio major* audit. Ceteræ quibusdam tantum bonis privant, & sunt: *Excommunicatio minor, interdictum, suspensio.*

#### XCVI.

Effectibus Excommunicationis spiritualibus additi subin etiam civiles sunt; unde *Principum* circa Excommunicationem jura quædam orta.

#### XCVI,



## XCVII.

Quibus usa AUGUSTISSIMA IMPERATRIX MARIA THERESIA anno 1768. præcepit, ut causa percussione Clerici, cui jure canonico poena Excommunicationis annexa est, a Commissariis ecclesiasticis, & secularibus pari numero discutiatur, ante sententiæ tamen incurse excommunicationis executionem, tam in hoc, quam in aliis casibus, *Placetum*, seu consensus Regius exquiratur \*).

## XCVIII


Vulgatissima hodie, ac frequentissima est excommunicatio, quam *late sententiæ* dicimus; cujus tamen per novem ecclesiæ secula, imo in ipso *Gratiani Decreto* vix ullum vestigium. Nempe monitionum vicem, quæ alias præmittebantur, lex ipsa, cui *excommunicatio late sententiæ* inserta est, subire creditur.





---

\*) Corp. Juris. Eccles. Bohem. p. 183. & 186.










Biblioteka Jagiellońska



stdr0030479



